



wantok

NESENEL

Niuspepa bilong ol Papua Niugini stret

Namba 227

Bilong wik i stat long Sarere, 15 Julai 1978

Prais 10t.

WATPO YUPELA WARI



LONG MIPELA?

Poto i kam long Pater J. Jurczyk, S.V.D.

Poto long lephan i soim Mista Brian Amini, dairekta bilong Opis bilong Infomesen, i toktok long wanpela grup pipel i bin kibung inap planti aua na paitim tok long wok niupepa insait long PNG. Man i rait em i Mista Ross Stevens, profesa bilong yunivesiti na long hap em i Mista Bill Kuamin, em tu i tis long yunivesiti. Planti man i bin autim tingting.



Poto namel i soim lain manmeri i bin winim spesel kos long ol pasin bilong salim ol kaving samting na mekim gutpela bisnis i kamap long en.

Lain i sindaun, kirap long lephan, i soim: Steven Bandi, Ariki Api, Helen Lala, Maino Bala, na David Saria.

Ol i sanap: Geoffrey Mwayemwana, Nicholas Kwenama, James Hau, Eka Hasu, Lama Komuna, Vincent Kulubwaga, Andrew Tonowe, na James Paiva.

Poto daunbilo i soim Minista bilong Midia (em prin na brotkas) i sanap toktok wantaim sampela bikpela brotkas hetman bilong ol kantri bilong Esia, i stap kibung long Port Moresby.



wantok
Newsprint bilong ol Papua Niugini stori

**National weekly in
 Melanesian Pidgin.**

Editorial Officers:
 P.O. Box 1982
 Boroko

Phone: 25.2214
 25.2552
Telex: NE 22213

Branch Offices:
 Wewak
 Phone: 86.2479

Wabag
 P.O. Box 111
 Phone: 57.1018

Advertising:
 In P.N.G.
 Ms. Penny Donald
 Phone: 25.2214

In Australia:
 Peter Halse Associates
 King York House
 32 York Street
 Sydney (2000)
 Phone: 29.7527
 Telex: 221.409

Subscription Rate:
 Annual: K8.00.





YU WARI LONG FAMILI O NOGAT?

Gavman i autim pinis wanpela wari bilong em i go long yumi olgeta pipel i stap hia insait long Papua Niugini. Gavman i wari tru bai yumi sot long graun, kaikai, skul na haus sik. Gavman i pilim i no longtaim bai planti pipel i pasim ples. Em i wari bai ol mama wantaim ol pikinini i bagarap na painim taim nogat.

I gut gavman i wari long ol dispela samting. Tasol watpo em i no askim ol pipel pastaim long tingting bilong ol long dispela bikpela hevi? Watpo em i no kirap na pasim tok long we bilong pinisim dispela wari.

Bipo, gavman i bin mekim olsem. Taim gavman i wari long graun, em i kirapim wanpela komiti long kisim tingting bilong ol pipel. Taim gavman i wari long spakpasin, em i kirapim wanpela komiti bilong raun long olgeta hap na kisim tingting bilong ol pipel. Taim em i wari long ol lo bilong yumi, em i kirapim wanpela komiti bilong kisim tingting bilong ol pipel long ol lo bilong PNG. Watpo gavman i no bihainim dispela we taim em i laik pinisim dispela nupela bikpela wari?

Dispela we em i we tru long pinisim wanpela bikpela wari. Dispela we i bihainim stret lo bilong ples, lo bilong tumbuna.

Yumi olgeta i save long lo bilong ples. Sapos wanpela bikpela wari i kamap, ol hetman i save bungim olgeta pipel na givim spes long ol long autim tingting na wari bilong ol. Olgeta i tok pinis orait ol bikman i pasim tok nau na i makim rot long stretim wari. Sapos gavman i bihainim rot olsem, em i no givim hevi long ol pipel. Sapos em i bihainim rot olsem, bai ol pipel i bilip moa long gavman. Sapos em i bihainim rot olsem, bai em i wok tru long stretim sindaun bilong ol pipel.

Olsem nau Wantok i singautim yupela ol man/meri long kisim pepa na bairo na salim pas i kam long mipela. Autim tingting tru bilong yu long ol dispela bikpela wari bilong gavman. Traim bekim dispela 3-pela bikpela askim:

- 1) Yu ting wanem? Wari bilong gavman i stret o nogat?
- 2) Yu laikim planti pikinini o wan wan tasol?
- 3) I gut ol mama i pasim bel o nogat?

Ritim gut stori long pes 3 hia long Wantok. Skelim gut dispela 3-pela bikpela askim na bekim i kam bak long mipela hia long Wantok. Bai mipela i givim long gavman.

Famili long as ples

Long mun Jun 52 nes na sosol welfe wokman bilong Katolik Sios i bin bung long Bomana inap long wan wik long stretim olkain tok long famili plening. Wanpela man i bin givim toktok long ol, em Mista Samson Kaipu, seketeri bilong Komisnin bilong Stretim ol Lo. Hia mipela i givim sampela aidia bilong em.

Bikpela as tingting bilong famili plening em i long lukaut gut yu karim hamas pikinini - bai yu helpim tru mama na famili na kantri. Tasol dispela wari long famili plening i mas bihainim ol pasin na kastam na lo na tingting bilong ol pipel bilong dispela kantri yet. I no samting bilong ausait tasol yumi bringim na kapsaitim antap long ol pipel - maski ol i laik o nogat.

Papua Niugini em i pulap long ol kain kain viles na hia i gat planti famili. Olsem olgeta tingting bilong famili plening i mas rispektim tingting bilong ol papamama na tumbuna long ol dispela ples. Ol dispela as ples pipel i gat 4-pela as tingting i hangamap long famili na pikinini yet. Em hia:

(1) Ol PNG i laikim pikinini. Yumi PNG i amamas tru long pikinini. Ol mama i no wari long arapela samting long ples, long pikinini tasol. Mama i no laik paitim pikinini; pikinini i bosim haus na famili.

Papa tu bai pilai wantaim pikinini na mekim em i slip kwiktai. Planti taim pikinini i slip long skru long papa long wanem em i tok em i pret long wanpela masalai i stap long tudak. Tasol papa i no gat tok.

Mama i karim pikinini nupela, em i no pret long go waswas long kolpela wara tru long moningtaim na wasim gut susu bilong

em na putim graun long em na mekim em i malu-malu bai pikinini i no hatwok long pulim. Mama i lukaut gut long kaikai bilong em yet taim em i gat pikinini long susu. Sapos pikinini i gat sik, papamama i save lusim slip na kaikai longpela taim moa. Na ol i no ting; ol i laikim pikinini.

(2) Karim nem bilong lain i go het. Olgeta famili i mas wari olsem wanem bai famili yet i ken go het. Na lain bilong em tu i mas go het. Bilong dispela i mas gat pikinini, tumbuna pikinini. Long ol ples we ol meri i papa bilong graun, ol i laikim planti pikinini, bai gat planti meri na planti moa graun.

(3) Lukautim ol papamama i lapun pinis. Sapos i gat planti pikinini, i gat sampela inap long lukautim papamama taim ol i lapun pinis. Ol viles pipel i no gat insurens bilong lukautim dispela samting. Pasin bilong daunim namba bilong pikinini inap

long tu samting, bai mekim hat long papamama taim ol i lapun pinis. Bai tupela yet i mas lukautim kaikai samting, sapos tupela pikinini i marit na i stap longwe long ples.

Ol papamama i ting, sapos ol i gat planti pikinini, maski sapos sampela i ranawe i go wok longwe, tasol sampela tu bai stap long ples. Na long PNG gavman i no lukautim ol lapun na ol sik bilong ol, olsem long sampela arapela kantri. Olsem sapos papamama i no gat pikinini, bai ol i rabis tru.

(4) Lukautim graun. Ol Papua Niugini i tingting planti na i wari long graun bilong ol. Graun em i olsem mahi bilong ol tru. Man i wari long ples bilong haus bilong em long viles, long ol gaden bilong em, long lain kokonas bilong em, lain buai o saksak.

Na planti hap graun i gat wara na baret na raunwara na bus. Em i bilong olgeta manmeri wantaim. Olsem man i mas gat pikinini long ples bilong pasim rait bilong em long go long ol dispela graun na yusim. Sapos em i gat planti pikinini, bai em i gat bikpela hap graun.

Sapos man i no gat pikinini i stap long ples, bai hap graun bilong em i lus. Na ol famili i gat pikinini, bai kisim.

Ol dispela i sampela wari bilong ol pipel long as ples. Na bilong ol dispela ol i laikim planti pikinini.

Bipo gavman i subim olkain aidia antap long ol pipel, em i no mas tingim ol pipel i sindaun long taun tasol. Em i mas tingim ol bikpela lain pipel i stap yet long as ples.





REDIO PILAI

Dia Edita - Yes ol brata na susa long olgeta redio stesin. Mi wanpela lisena bilong redio Morobe. Olgeta wari yupela wokim i gutpela mipela olgeta i amamas tru long singsing, foktok na sampela samting olsem.

Tasol long wari bilong mi em ol problem ol i kolim "Radio Play" dispela redio ple i no gutpela long ia bilong mi na sampela ol pikinini tu. Mi save baim Wantok niuspepa oltaim na mi lukim planti man save rait long ol meri bilong PNG i save marit long waitman o ol save laikim ol man i gat save na kisim bikpela mani o ol meri krismas bilong ol inap 14 na 16 i gat sik V.D.

Mi ting ol dispela lain meri ol i kisim save long progrem redio ple. Sampela taim mi harim "radio play" em wanpela lapun grisim pikinini meri bilong em long maritim wanpela saveman. Na wanpela taim redio ple makim man i grisim wanpela waitman long kisim pikinini bilong em bai ol i givim graun long dispela waitman bai em i wokim bisnis o samting olsem, wanpela taim mi harim long redio ple. Wanpela man i baim drink i go na dring wantaim papa bilong meri long tupela i dring i go na lapun ya i spak pinis na man bilong baim bia i go insait long rum dispela yangpela meri.

Em ol kain "redio ple" olsem i no gutpela tumas long ia bilong yumi, o taim ol liklik pikinini i sindaun wantaim yumi na kain ple olsem i kamap em ol i putim ia na harim gut i stap. Bihain bai ol i mekim long wanem redio ple i opim ia bilong ol pinis.

Insait long mun Jun niuspepa na redio toktok long pasin pamuk na sik V.D. i kamap long Morobe Provins na sampela hap tu long ol meri krismas bilong ol 14 i go inap 16 ol i painim dispela sik.

Na long dispela mun Jun tasol sampela ol meri bilong Lae i bung long Y.C. klap na painim sampela rot bilong stopim dispela wok o pasin pamuk. Na ol i tok long dispela ol yangpela meri i wokim dispela pasin em samting bilong papamama yet i ken givim toktok o stopim ol tasol tulet. Olsem mi tok pinis ol i kisim save o harim pinis long ol dispela aidia redio ple i skulim ol olsem na ol i laik traim bihainim tingting bilong redio ple hia nogat, astte yet ol i kamap nupela nem V.D. pinis.

Yes ol lisena em tasol liklik wari o tingting bilong mi. Husat i gat tingting long dispela wari bilong mi, orait, bekim tasol i go long Wantok.
Simon Selep,
Lae.

AUTIM GUTNIUS

Dia Edita - Nau mi laik autim liklik wari bilong mi na yupela inap long larim liklik spes long putim tok bilong mi.

Wari bilong mi i go olsem: Mi yet mi save lukim sampela misin i save autim tok bilong God long ples maket. Mi bin lukim dispela insait long Saten Hailans Provins.

Mi pilim dispela pasin bilong autim gutnius, i no gutpela tumas long ples maket. Bilong wanem mi tokim olsem. Mi no amamas tru. Bilong wanem? Maket em i ples bilong amamas na bikpela toktok i kamap olsem kria bilong pik. Man o minista o ivanselis o katekis i autim tok bilong God.

Mi tok tru. Ol i no inap tru long harim yu. Tok bilong yu bai i go insait tru long tingting bilong manmeri. Ol bai pilim na kisim gutpela skul bilong yu? Nogat tru. Man, tok bilong God bai mekim olsem.

Sapos mi lukim planti pisin i pulap tru long wanpela diwai i gat naispela prut. Yu tromoi wanpela

ston tasol dispela ston i go pairapim nating long han bilong diwai tasol.

Dispela kain bai i kamap olsem long tok bilong God. Em bai i no bilong man, nogat tru? Em bai tasim gras bilong skin tasol i no inap i go insait tru.

Tru mi save lukim na ritim Baibel. Baibel i tok wanem hap yumi go, autim tok bilong mi. I gutpela tru yumi mekim olsem. Tasol ples bilong autim gutnius em long haus lotu o long ples we man meri i save bung long wanpela ples. o long haus we famili i save i stap long en.

Ating, sapos yumi mekim dispela pasin bai pipel inap tru long pilim tok bilong God. Na tu ol bai tingim bek long sindaun bilong ol tu. Skul o eksampel yu mekim em bai pilim tru na tu em bai ting bek long wanem tok bokis i kam long em.

Olsem na yumi i no ken pairapim toktok bilong God nating olsem laitning. Em* tasol long liklik wari bilong mi. Husat wantok i belhat tru, orait, rait tasol i go long Wantok Nius.
Samuel Sengi,
Erave/S.H.P.

Salim ol pas i kam long:
**WANTOK
BOX 1982
BOROKO**

LAIP NA BIA

Dia Edita - Hi mi laik autim wari bilong mi i go long yupela husat i salim bia. Mi lukim planti man ol i bagarap long bia. Yes pren yu husat i laikim tumas bia yu ken dring.

Bia em i gutpela samting bilong pulim winmani i kam tasol em i no gutpela samting. Long wanem mi i tok olsem? Taim man i dring na spak wantaim na

draivim ka, orait em i go na tromoi ka long ples nogut na laip bilong planti man meri pikinini i lus. Na laip bilong draiva tu i lus.

Yu ting wanem? Laip bilong man em i namba wan samting o bia em i namba wan samting. Na yu husat bikman olsem memba o minista yu tingting long yu laik opim rot bilong bia yu mas tingting gut pastaim na skelim dispela tupela samting laip na bia.

Em tasol yu husat i laik joinim tingting bilong yu long dispela pas, orait, raitim pas long Wantok.

Temale T.
Tambul/W.H.P.

HARIM TOK

Dia Edita - Mi no amamas tru long ol planti pipel i save ranawe long taim Malaria Kontrol i laik pamim haus bilong ol. Planti taim ol i save lokim haus bilong ol na i go nabaut long moning taim tru.

Dispela i save kamap taim ol i kisim tok save pinis olsem neks moning bai Malaria Tim bai spreim ol haus long dispela hap long dispela taim. Dispela i no gutpela pasin tumas. Planti taim mi lukim ol dispela manmeri i save sik na tok: "O, mi kisim sik malaria". Em i rong bilong husat?

Em i no rong bilong ol man i pamim haus bilong yu. Nogat. Em i asua bilong yu yet long yu save ranawe long ol dispela man bilong Malaria Sevis. Mobe yu tingting long helt bilong yu.

Benson N. Zake,
Port Moresby.

NO LUKIM M.P.

Dia Edita - Mi laik puti dispela wari bilong mi i long Wantok niuspepa Taim mi stap long stanc faiv (5) long yia 197 memba bilong Nipa Le Kutupu Open, Mista Ib Kor i bin tokim ol pipel sem: Em bai kirapim Nij Lek Kutubu, Poroma, Magarima tu.

Taim em i bin kemp na ol pipel i votim em em i win. Na long yia 19 i kam inap long Jun 1978. Mi no bin har sampela toktok bilong e Na taim em i kempen ei tok em bai kirapim w long Nipa, Magarin Poroma, Lek Kutu Tasol i no gat samting kamap long ol dispela pl Mi bin tok long en. long Nipa bus i karamap tru. Bai mipela i no in lukim dispela. Tm tasol.

Jack Noml
L

AS PLES NOGAT

Dia Edita - Mi save har planti man ol save tok sem Lae em i ples bilo kisim K2 long bus. Olse na mi laik tok save lo yupela ol manmeri bilo PNG olsem ol meri em save kisim K2 long b long Lae em ol i no bilo Morobe Provins.

Nogat. Ol i bilong na pela provins. Tasol ol kam i stap long Lae painim K2 long bus. Na no ol meri bilong asp. Morobe Provins. Nog yeupal i ting ol meri Moi be salim skin na kisim K Nogat tru.

Paulus Bena
Port Moresby

WINIM MANI ISI TUMAS
PAINIM NA KISIM OLPELA TAIA I KAM
MIPELA DUNLOP I SAVE BAIM
DUNLOP
LAE: Aircorps Rot - klostu long maket

Dokta meri fiksik tit

Misis Kesia Beaga em i namba wan meri long Papua Niugini i kirapim bisnis bilong em stret long fiksik tit. Opis bilong em i stap long Port Moresby.

Misis Beaga i gat 30 kris-mas na i kam long Vunavatikai viles klostu long Rabaul. Em i bin go long Vunaima Praimeri Skul na bihain long George Brown Haiskul. Bihain em i kam long koles bilong ol dokta tit long Port Moresby.

Em i winim tripela yia skul bilong em na i kisim setifiket long yia 1970.

Inap tu yia stret em i raun nabaut mekim wok dentis

o dokta tit - long ol haus sik bilong gavman. Orait, bihain em i kisim tok orait long mekim wok bilong em yet.

Inap 8-pela yia em i mekim wok dentis wantaim pablik sevis. Na nau em i statim bisnis bilong em yet. Em i amamas tru long kamap namba wan dokta meri bilong PNG i-nap long statim wok bisnis long kamautim na fiksik tit.

Dokta Beaga i gat 3-pela pikinini. Na man bilong em Arthur, i hepi tru long meri bilong em i statim bisnis bilong em yet. Kesia i tok olsem, i no isi long wanpela maritmeri i kisim tok orait na amamas long man bilong em long statim bisnis bilong em yet.


Bisnis bilong Dokta Beaga i ran inap long sampela wik nau na planti waitskin na lokal pipel tu i save kam long em.



Poto i soim sampela plismeri i holim wok long Boroko Plis Stesin long Port Moresby. Man ya em i Konstabel Judas Solias bilong Milne Bay Provins. Meri namel em i Konstabel Julie Givera bilong Morobe Provins., na meri long raithan em i Konstabel Joan Paul bilong Manus Ailan.



EM GUTPELA KAUKAI



SOLPIS WANTAIM GRINPELA POPO

Yu redim ol dispela

Sampela solpis
Wanpela grinpela popo
Wanpela kaukau
Sampela kumu o grin lip o sayor
Sampela tomato na sampela anien
2-pela kap wara
Sampela lip banana

Yu kukim olsem:

Katim solpis liklik liklik. Rausim skin bilong kaukau na katim liklik liklik. Rausim skin bilong grinpela popo na katim longpela longpela. Wasim ol kumu na katim liklik liklik. Katim tu ol anien na tomato liklik liklik.

Kisim sampela lip banana. Lainim ol hap kaukau antap long lip banana. Nau lainim kumu na tomato na anien antap long kaukau. Antap long dispela, yu putim ol liklik hap solpis. na antap long pis yu slipim ol hap popo. Nau kapsaitim sampela wara antap long ol dispela samting na karmapim gut long sampela lip banana. Putim nau insait long sit bifong paia na kukim inap 3 aua samting.

EVINRUDE

NAMBAWAN AUTOBOT MOTO

6H.P 15H.P 25H.P 35H.P

PLANTI SPEA PAT I STAP

PRAIS I DAUNBILO NAU

BAIM TUDE LONG



BOROKO MOTORS

And Subdealers



THE INVESTMENT CORPORATION OF PAPUA NEW GUINEA



Long poto antap yumi ken lukim sampela man bilong Tari long Saten Hailans i sanap holim winmani ol i bin kisim long. Invesmen Koporesen ofis klostu long ol.

BAIM SEA LONG INVESMEN KOPORESEN
BILONG PAPUA NIUGINI

*na bai yu kisim winmani bilong wanpela
bikpela bikpela kampani tru*

Sapos yu laik save moa long we bilong kisim
winmani, yu rait long: Investment Corporation
P.O. Box 155
Port Moresby

NEM BILONG YU:

ADRES BILONG YU:
.....


NIUS I KAM LONG PROVINS

KURONDO

EGENSIM OKUK

(Simbu Provins)

Mista Iambakey Okuk



Primia bilong Simbu Provins, Mista Siwi Kurondo, i jin egensim wanpela bikpela aidia bilong wantok bilong em stret, Mista Iambakey Okuk, lida bilong oposisen.

Mista Okuk i no laikim provinsal gavman. Em i laik bai ol i pinis na kantri i gat 4-pela rijinal gavman tasol - ol Hailans, ol Ailan, ol Niugini nambais, na Papua.

Mista Kurondo i tok olsem, dispela kain pasin katim kantri long 4-pela hap na i no bungim ol pipel. Em i tok, ol pipel yet i no bel nogut long ol provinsal gavman, na ol i save ol opisa na gavman i hatwok yet long mekim ol i an gut.

Mista Kurondo i pret bai long rijinal gavman ol bikpela an tasol i go het gut na kisim planti samting na i no gat an i wari long ol rabisman na ol man long as ples. Yumi ave toktok planti long yumi stap wanpela pipel, bilong anem nau yumi wokim kain kain banis bilong katim antri? Provinsal gavman i bin mekim gutpela wok long elpim wan wan provins.

TAUN PULIM PLANTI YANGPELA

Long miting bilong Isten Hailans Provinsal Gavman, Mista James Yanepa, Primia bilong Isten Hailans i tokaut ong ol yangpela man meri i ranawe long bus na sut i go ong ol taun. Em i tok olsem, ol skul i no redim ol manki ut long go bek long ples na helpim ol papamama. I no ongtaim bai planti kain kain trabel bilong ol arapela antri i kamap long PNG tu.

Membra bilong Isten Hailans, Mista Atopare, i sapatim ok bilong Primia na i skruim sampela tok moa. Em i ok, ol papamama i no helpim ol manki long lainim ol utpela pasin bilong ples. Na tu ol beng i no laik helpim ol yangpela long dinau mani bilong kirapim sampela isnis.

Miting i wari tru long dispela trabel. Tasol Mista Atopare i tokim ol, ol i no inap wokim wanpela lo long pasin ol yangpela manmeri long ples. PNG i fri na miting i o inap wokim lo long pasim ol yangpela insait long ples.

AIN BILONG PIPEL

I BOSIM FILM

(Nesanel Kepitel Provins)



Minista bilong Foren Afeas, Mista Ebia Olewale, i bin akim wanpela lain manmeri olsem komiti bilong bosim geta film na buk i kam insait long kantri, bai ol buk na m i gat aidia o poto o tok nogut i no ken kam insait igarapim tingting bilong ol pipel. Ol i holim dispela ok igap long wan yia.

Em hia nem bilong ol: Leo Morgan, Mekere Morauta, Dick Avi, Legu Lee, Jean Kekedo, Renagi Lohia, Bernard Sakura, Solo Tongia, Tarcissius Bobola.

MOROBE KISIM MANI

Nesanel Gavman i givim K100,000 (wan handet tausen kina) long wokim Aseki - Slate Krik Rot. Mani bilong Rural Impruvmen Fan i pinis. Olsem Provinsal Gavman i askim Nesanel Gavman long helpim ol long sampela mani bai wok i ken go het. Provinsal Gavman i ting bai ol i mas kisim K130,000 moa gen long pinisim dispela rot.

Nawae Kampani, wanpela kampani bilong Lae yet, bai pinisim wok long dispela rot. Ol bai kisim ples bilong Zorba Kampani. Zorba Kampani i wok long dispela rot long 1975 i go inap long 1977. Ol i ting bai ol i mas wok 5-pela yia moa inap ol i pinisim dispela wok.

NU AILAN HELT KOMITI

Provinsal Helt Opisa, Dokta Levi Sialis, i bin tok, wanpela nupela Helt Komiti i kirap pinis long Nu Ailan. Dispela Helt Komiti i gat wok long helpim helt dipatmen long stretim ol wok helt insait long ol wan wan liklik ples. Em i tok bai ol komiti memba i mas go insait long ol wan wan ples na bungim ol pipel. Ol i mas harim ol wari na tingting bilong ol pipel.

Narapela wok gen bilong ol komiti em i olsem, ol i mas was gut long ol wok bilong kirapim ol nupela Et Pos, ol wok bilong ol odeli, na painim we long bringim ol man i gat bikpela sik i go long haus sik long Kavieng.

Las wok bilong ol em hia: Ol i mas bungim ol pipel na harim ol wari na hevi bilong ol. Ol i mas bringim dispela ol ripot i go insait long miting bilong ol na traim painim we long pinisim.

NU BRITEN KROS LONG GRAUN

Is Nu Briten Primia, Mista Koniel Alar, wantaim Namba tu Primia, Mista Anton Bos i tok olsem, ol i gat moa long 380 hekta graun i stap nating long Kokopo. Na tu insait long Rabaul taun i gat 267 man i wet long kisim graun long wokim haus. Graun i stap, bus i stap, tasol ol bos bilong dipatmen bilong bosim ol bus na wari i slip tumas.

Ol Provinsal Gavman i hatwok tru long stretim ol dispela trabel insait long Provins, tasol Dipatmen i pasim wok bilong ol.


I gat planti graun liklik i stap insait long Rabaul taun, i gat hap bus long Kokopo, tasol Nesanel Gavman i no laik larim Provinsal Gavman i go het long wok bilong stretim toktok long graun na tilim i go bek long ol pipel.

Tupela bikman i tok ol-


Pasto Dick Avi

Poto long raithan i soim biktaun Rabaul we i gat planti pipel na ol i kros long graun.

Rabaul i gat bikpela pasis tru na nabaut long taun i gat 5-pela maunten i save pairap. Yu ken lukim wanpela namel long poto.



MASKI HATWOK LONG HATIM WARA NA PAITIM KLOS



**“COLD POWER”
WANTAIM KOL
WARA INAP**

PIPEL LONGLONG YET LONG PROVINSAL GAVMAN

Primia bilong Nu Ailan Provins, Mista Robert Seeto, i bin raun long provins bilong em na toktok wantaim ol pipel, long wanem sampela lain bilong ol i bin kirap toktok ol i no laikim provinsal gavman. Tasol ol i laikim gavman i gat presiden.

Tasol Mista Seeto i tok, em i bin painimaut olsem: planti pipel i no save tru provinsal gavman em i wanem samting, na planti pipel i no save tru provinsal gavman em i wanem samting, na planti i no laik senis na kisim sampela nupela aidia. Ol i laikim ol samting bilong bipo. Na tu ol lida i no stiaim ol gut.

Ol pipel i kirap nogut bikos ol i no lukim olsem wanem provinsal gavman save helpim go het bilong ples bilong ol.

KAIKAI BUAI HELPIM TIT

Ol dokta long Is Sepik ting ol pipel bilong dispel provins i win tru long gut pela tit bilong ol. Man lukautim tit bilong ol, en Mista John Rogers, i bin tok olsem long wanpela ki bung.

Mista Rogers i bin glasin gut ol wok tit long ol I Sepik na i tok, ol pipel gat hul long tit, em ol stap long ol taun. Ol vile pipel nogat.

Ol pipel long taun ol save kaikai planti loli samting na ol i no save klinin tit. Tasol ol viles pipel i ga gutpela tit long wanem o i kaikai planti buai na sak sak. Saksak i no olsem loli em i no save pas name long ol tit na kamapim hu long ol.

Mista Rogers i tok, o pipel long taun ol i sav kaikai planti kain nupel kaikai bilong waitman n planti swit samting, na o dispela i bagarapim tit bilong ol.

WOK BIKBEL LONG SEPIK

Yumi bihainim lek bilong tupela man i gat bisnis bulmakau nau i wok long kisim trening inap 10-pela wik long bikpela Stesin Bulmakau long Urimo, Is Sepik.

Nem bilong wanpela em So'on Makung. Em i gat 26 krismas na i bilong Norehet viles long Manus. Narapela ya em Joseph Alku. Em i gat 30 krismas na i bilong Malol/Aitape long Wes Sepik. Wanpela i gat 5-pela bulmakau long ples; na narapela i gat 4-pela. Lokal Rural Development Opisa long hap bilong ol i bin makim tupela long kam long dispela skul na kisim trening.


Gavman i baim rot bilong tupela na i givim kai-kai nating long tupela long dispela taim bilong skul. Tupela i amamas long skul tupela i kisim nau. Bihain tupela i laik go bek long ples, kisim dinau long beng na kirapim wok bulmakau.

Skul ya long Urimo inap long trenim 48 man long wan wan kos. Tasol dispela em i no skul tasol bilong ol fama. Nogat. Ol i groim tu olkain bulmakau fia bai ol fama i ken kam baim na statim wok bilong ol yet. Na ol i wok oltaim long painim nupela marasin na pasin bilong rausim kain kain sik bilong ol bulmakau na pik na graun. Na tu ol i painim wanem kam gras i save kamap gut long graun bai ol bulmakau i gat planti kaikai.

Man i bosim stesin em i

Poto long raithan i soim ol bikbel. Ol i laikim tumas karamap long graun malumalu taim san i hat.

Man daunbilo i yusim wailes bilong toktok wantaim arapela hap bilong stesin Urimo.



Mista John Schottler. Em i bilong Australia na i gat kain kain setifiket bilong wok fama na bulmakau.

Urimo Stesin i bikpela moa na i gat 3-pela hap bilong en. Urimo yet em i 4 na 1/2 hekta tasol; narapela ol i kolim Poimbit i gat 1800 hekta; na namba tri hap i gat 3000 hekta - na i no gat nem yet.

Ol i gat 560 Brahman kau na sebu kau, 1100 bikbel o bafalo, na 50 kain pato.

Stesin i bin kirap long 1965 na long dispela taim ol i bin karim 800 kau i kam long Australia. Tasol ol i go bun nating na ol bosman i wari na i kisim sampela bikbel o bafalo i kam long hap bilong Rabaul. Na ol i bin painim olsem, ol bikbel ol i save kamap gut tru. Na dispela nupela kain bulmakau ol i kolim Sebu, em nau i wok long kamap gut tu. Tasol Urimo i ting moa long mekim wok bafalo i go bikpela, long wanem ol bafalo i no save painim planti sik na ol i strong moa na mit bilong ol i gutpela kaikai.

Mista Schottler i tok olsem: ol i bin kirapim wok pato tu bilong helpim ol ples. Long wanem planti

hap bilong Sepik i gat wara na tais na tait, na ol pati i pilim gut tru. Kiau bilong ol i gut na mit bilong ol i nambawan na i wankain olsem bilong ol paul stret.

Taim ol i statim Urimo long 1965, i no gat rot yet i go long dispela hap. Ol i wokim wanpela ples balus na ol i bin karim ol samting i kam long balus tasol. Tude dispela ples balus i no gat wok bilong en, long wanem i gat gutpela rot i kamap long stesin na i bung wantaim Sepik Haiwe.

Nau olgeta haus na graun na bulmakau samting i kostim inap wan milion kina. Mista Schottler i gat 2-pela tural developmen opisa bilong helpim em, 3-3-pela spesel man bilong ranim na fiksik olkain masin bilong wok fama, na

25 wokboi. Olgeta ol i stap long ol viles klostu.


Bikpela tingting bilong Mista Schottler em i long mekim planti bafalo moa i kamap bai Is Sepik i gat inap mit bilong ol pipel bilong em. Na bihain ol i ken salim long ol arapela hap bilong kantri.


Wanpela wari i pasim rot bilong dispela wok yet, ol ples kunai bilong hap bilong Sepik i nogut tumas long ol bafalo. Olsem ol i traime nau putim marasin bilong grisim graun na mekim gutpela kain gras i kamap. Gutpela gras i mekim ol bafalo i gro hariap na karim moa pikinini.

Long dispela stesin Urimo i gat inap 50 kilomita rot ol yet i bin wokim long buldosa. Ol i gat

wailes bilong toktok wantaim ol arapela hap bilong stesin. Ol waia banis i gat lektrik pawa insait na sapos kau o bafalo i pilim em, bai pawa i kikim em tru na em i pret na i save abrusim waia.

Bihain bai ol i mas gat narapela 40 wokman bilong helpim ol long katim bus na redim dispela namba tri hap bilong Urimo i gat samting olsem 3000 hekta graun. Long pasin bilong ol, bai ol yet i wokim ol haus bilong ol na gaden samting bilong ol stret long stesin yet. I gat planti abus long bus bilong stesin - olsem pik, sikau, muruk. Na olgeta wara na baret i gat pis olsem makau na maleo na tu planti trausel. Olsem ol i no ken sot long kaikai. Olsem na i no gat wari long painim wokman.





WARI LONG GRAUN

Tude yumi i gat klostu 3 milion pipel i stap insait long PNG. Long 1998 bai i gat 5 milion pipel. Ol dispela man bai painim graun we long wokim bisnis. Bai ol meri i painim graun we long wokim gaden. Tude tripela PROVINS i sot pinis long graun. Simbu, Saten Hailans, na Is Nu Briten: Long 1996 bai planti provins moa i sot long graun. Bai yumi mekim wanem? Plenti graun i tais o bikpela maunten i go antap moa. Yumi no inap wokim gaden o bisnis long ol dispela kain graun. Olsem gavman i wari.



WARI LONG KAIKAI

Tude long PNG plenti mama i save karim 5 o 6 o 7-pela pikinini. Ol dispela pikinini bai i painim kaikai we sapos yumi sot long graun. Tude yumi no inap painim kaikai bilong olgeta pipel bilong PNG. Yumi save baim plenti rais na tin pis long Australia na Japan. Bai yumi painim kaikai we long helpim 5 milion manmeri long yia 1996. Olsem gavman i wari.

PLANTI PI

Minista bilong bosim ol bus na wara, Mista Stephen Tago, i autim wanpela bikpela wari bilong gavman bilong yumi hia long PNG. Minista i tok olsem. Gavman i wari tru long 4-pela samting.

Klostu yumi sot long graun, kaikai, skul, na haus sik.

Minista i tok olsem; nau tasol yumi tingting gut na painim wanpela gutpela we long pinisim dispela bikpela wari. Nogut dispela wari karmapim yumi olgeta. Nogut yumi ol pipel i painim taim nogut. Minista i tok - nau em i taim bilong painim rot stretim wari bilong yumi.

Nau em i taim long painim we bilong pinisim ol dispela wari. Yumi no ken tok bai yumi stretim wari bihain. Nau em i taim long stretim ol dispela bikpela wari.

Ol Pablik Helt Dipatmen i salim dispela tok i go aut long ol pipel na planti papamama i longlong tru long dispela tok. Ol i no save dispela tok i tru o nogat. Em i stretpela tok o em i tok win tasol. Em i tok tru o em i tok giaman long kirapim bel bilong ol pipel.

Mipela hia long Wantok i hariu. ol dispela tok pinis na mipela i wari tru. Olsem wanem long ol dispela wari gavman i autim pinis? Ol pipel tu i wari o gavman tasol i wari. Em i wari tru o ol bikman tasol i wari.

Olsem na mipela lukim gut ol pas gavman i salim i kam hia long Wantok Opis. I no wanpela pepa tasol. Plenti pepa moa i kam long opis. Ol dispela pepa i autim tru ol wari bilong gavman. Mipela i ritim pinis ol dispela wari na mipela i pilim olsem. Wantok i mas autim ol dispela wari i go long ol pipel. Ol pipel yet i mas skelim ol dispela wari. Ol pipel yet i mas glasim ol dispela tok. Ol pipel yet i masbekim. Ol pipel yet i mas autim tingting bilong ol i go long gavman. Na gavman i mas bihainim tingting bilong ol pipel. Nogut gavman i bihainim wanpela rot na ol pipel i bihainim narapela rot na tupela i bam. Gavman na pipel i mas wok wantaim. Gavman na pipel i mas wan-



EL TUMAS

bel. Gavman wantaim pipel i mas wok long pinisim ol dispela wari.

Olsem na mipela i laik autim ol wari bilong gavman i go long yupela ol manmeri insait long ol wan wan ples.

AS TRU BILONG OL DISPELA WARI


As tru bilong ol dispela wari em ol papamama. Ol mama i karim 5 o 6 o 7-pela pikinini. Plenti pikinini olsem i save pinisim tru ol kaikai bilong gaden, ol marasin long haus sik. Ol i bikpela liklik bai ol i kraɔ long go long skul. Ol i bikpela pinis ol i kraɔ long papa long kisim graun long wokim gaden o bisnis. I luk olsem. Sapos PNG i gat wan wan pikinini bai i no gat wari, i no gat trabel insait long ples. Sapos PNG i gat plenti pikinini bai i gat planti wari na trabel long ples.

WE LONG PINISIM WARI

Yumi ken pinisim ol dispela wari olsem wanem? Gavman i tok yumi mas pinisim dispela wari olsem. Yumi mas tokim ol mama long karim wan wan pikinini tasol. Yumi mas lainim ol mama long we long pasim bel bilong ol. Yumi mas pasim bel bilong ol sampela mama i gat pikinini pinis bai ol i no ken karim pikinini gen. Yumi mas katim bol bilong ol sampela papa bai ol i no inap long kamapim pikinini moa. Em as tingting bilong gavman. Em rot gavman i opim long pinisim ol dispela wari bilong yumi. Em we bilong stretim wok insait long kantri bilong yumi PNG.



TOK I GO LONG OL PIPEL

Yumi harim pinis wari bilong gavman na tingting bilong gavman. Olsem na askim i goaut long yupela ol pipel. Yupela ting wanem? Em i gutpela rot long pinisim ol dispela wari? Yupela i ting wanem. Inap yumi pasin bel bilong ol mama o katim bol bilong ol papa? Yupela i gat wanem tingting tru?



WARI LONG HAUS SIK

Tude mipela sot liklik long haus sik insait long plenti ol hap bus nabaut. Long 1996 bai yumi sot olgeta. Plenti pipel bai i hatwok tru long painim haus sik long pasim sua, long kisim sut. Bai mipela i sot tru long ol dokta, na sista long helpim ol sikman. Olsem Gavman i wari.



WARI LONG SKUL

Tude mipela sot liklik long skul. Long 1996 bai yumi sot tru. Long 1996 bai planti manki i raun faun nating. Nogat skul. Nogat tisa. Nogat save. Gavman i laik bai olgeta pikinini i mas go long skul. Gavman i laik bai olgeta pikinini i kisim save. Gavman i laik bai olgeta pikinini i kamap gutpela sitisen long PNG. Olsem gavman i wari.



AIR NIUGINI
THE NATIONAL AIRLINE OF PAPUA NEW GUINEA

**MIPELA GAT SAMPELA
SPESEL BALUS BILONG
KARIM KAGO**

EM HIA KAGO BILONG WANPELA BALUS

**Sapos yu laik samting i kamap hariap
orait, yu putim long balus tasol**

**STORI
TUMBUNA**

Nem bilong dispela meri em Tuwai. Tuwai i go long kisim paiawut bilong praim saksak. Na em i lukim wanpela snek i slip i stap. Nem bilong snek em Pumakua.

Tuwai i karim snek em i pasim long lip kapiak na putim long bilum bilong em. Snek em i no dai. Tuwai i gat bikipela sua long baksait bilong em. Em nau, snek i lukim sua bilong Tuwai em i kirap i go insait long sua bilong em.

Tuwai i go long haus, em i putim paiawut pinis, em i tok long pikinini bilong em: "Ei, ei, pikinini, kam na lukim wanem samting tru i stap long sua bilong mi". Pikinini bilong Tuwai i ran i go, em i lukim snek i go insait pinis long sua bilong mama bilong em. Mama i tok: "Kisim dispela snek na tromoi".

Pikinini i laik holim snek, em i kalap pinis long bel bilong Tuwai. Snek i stap insait na i katim bel bilong Tuwai, na em i kaim, na Tuwai i dai. Ol pikinini bilong Tuwai i wokim hul na planim em. I stap wanpela mun nau na namba wan pikinini bilong Tuwai i digim hul na em i lukim snek i stap yet long hul. Na pikinini bilong em i kilim na karim i go long haus bilong papa bilong em. Na ol i kukim long sospen na ol i kaikai.

Joseph Whisky,
Warimb Kom. Skul
Torembi. Is Sepik.



BEKIM BILONG SNEK

**OL WAITMAN PINISIM NIUSPEPA
BILONG BLAKMAN**

Gavman bilong Saut Afrika i pinisim wanpela niuspepa bilong ol sios, em ol blakman yet i raitim long autim tingting bilong ol wanskin bilong ol. Nem bilong niuspepa "The Voice". Em i min: nek.

wanpela grup bilong olgeta Kristen Sios long Saut Afrika i bin bosim.

Ol plisman i bin holim-pasim edita bilong dispela niuspepa. Nem bilong em Mista Revelation Ntoula. Gavman i no laikim sampela kain aidia em i bin

prinim. Tasol em i tokaut olsem: dispela pasin bilong pasim maus bilong wanpela niuspepa na traim pasim tingting bilong ol blakman, em bai pairap tru wanpela de.

Pasto David Wanless, dai-reikta bilong dispela grup i ranim niuspepa, i tokaut olsem: Gavman bilong Saut Afrika i pasim yau tru na i no laik harim tru ol wari bilong ol blakskin bilong kantri. Tasol ol i no ken pasim maus bilong ol blakskin. Mipela long niuspepa i bin traim stretim tok, na wokim bris namiel long olkain pipel. Tasol gavman i no laik.

Em i tok moa olsem: Dispela gavman bilong ol waitman i no laik harim tru sampela tok bilong ol blakskin pipel i krungut pinis long ol lo bilong "aparteit". Em i lo i tambuim ol blakskin long kisim olkain samting olsem ol waitman. Ol blakskin ol i namba tu na rabis samting, wokboi nating bilong ol waitman.

Oltaim dispela niuspepa "The Voice" i traim autim tingting tru bilong bel bilong ol blakskin. Tasol gavman i bin traim pasim rot bilong em, i bin pretim ol wokman bilong em, i tambuim ol long raitim kain kain samting em i no laik. Na sampela traim gavman i bin kalabusim ol ripota bilong "The Voice".

WACC - em i wanpela han bilong Wol Kaunsil Bilong ol Sios i helpim ol wok bilong prin na redio - i bin statim dispela niuspepa long yia 1976. Na

BAIM WANTOK

Sapos yu laik kisim Wantok niuspepa inap long wan yia (em i olsem 48 taims), yu katim dispela tiket long sisim na yu salim i kam long mipela wantaim K8.00.


Nem bilong yu.

Adres bilong yu.

Salim sek o mani oda inap long K8 wantaim tiket i kam long :
WANTOK BOX 1982 BOROKO

Sapos yu bilong wanpela skul o misin o klap o grup na yu laik kisim moa olsem 10-pela Wantok olgeta wik, orait, yu rait i kam long mipela na mipela i gat spesel prais long dispela kain samting.

Prais bilong go long Australia: K14.50 na long Amerika na Yurop long sip em i K18.20 na long balus em i K24.00.



YUMI AMAMAS LONG COKE



COCA-COLA AND COKE ARE REGISTERED TRADEMARKS WHICH IDENTIFY THE SAME PRODUCT OF THE COCA-COLA COMPANY.

HRME 015 630

BESENA WINIM PANGU

Long wik i go pinis long tupela ileksen long Port Moresby tupela memba bilong Papua Besena i bin winim tupela bilong Pangu Pati.

Mista Mahuru Rarua Rarua i winim Moresby Not-Wes. Na Dokta Goasa Damena i winim Moresby Not-Is.

Bihain long bikpela ileksen Mista Gavera Rea, em Minista bilong Leba na Industri long las gavman na memba bilong Pangu Pati, i bin kotim Mista Rarua Rarua long pasin em i bin yusim long taim bilong vot. Na kot i bin makim nupela ileksen. Long namba wan taim, Mista Rarua Rarua i bin win tu. Tasol em i bin lusim namba long lo bilong kot na olem i gat bai-ileksen. Na dispela namba tu taim em i kisim 2919 vot na Gavera Rea i kisim 2695 tasol. Olem i no gat tok moa.

Na long ileksen long Moresby Not-Is, Dokta Damena i bin winim Sir Maori Kiki long 28 vot tasol. Em i kisim 1031 vot na Sir Maori i kisim 1003 tasol. Komisnin bilong bosim ileksen i bin kaunim ol dispela vot tripela taim bilong soim i no gat giaman o trik samting.

Sir Maori Kiki em i wanpela man i bin helpim Michael Somare long statim Pangu Pati bipo. Long las gavman em i Minista bilong Difens, na tu bilong Foren Afeas. Na bipo em i namba tu praim minista. Long mun Julai Mis Josephine Abaijah i bin winim em long provinsal ileksen.

Long bikpela ileksen Mista Patterson Lowa i bin

winim dispela ileksen bilong Moresby Not-Is. Em i bikpela Pangu memba long Moresby. Kwiktaim em i kamap Minista bilong Plis insait long nupela gavman na i kirap mekim planti strongpela samting insait long liklik taim. Bipo em i opisa long ami.

Tasol Dokta Goasa Damena i bin kotim em long komisnin bilong bosim olgeta ileksen na i bin soim long kot, dispela Patterson Lowa i no bin sindaun i stap inap 6 mun insait long dispela ilektoret bipo long taim bilong ileksen. Kot i bin painim dispela i tru; olem na ileksen bilong em i nogut na em i lusim namba. Ol i makim nupela bai-ileksen. Na dispela taim Patterson Lowa i lusim sapot bilong Pangu Pati. Pangu i bin sapotim Maori Kiki. Tasol Pangu na Kiki, tupela i lus. Na Lowa i kisim namba daunbilo moa long ol vot.

Praim Minista i bin makim 3-pela moa edministretiv seketeri. Ol i gat namba wan wok long bosim ol wok long wan wan provins, aninit long hetman, em primia tasol. Nem bilong ol em hia:

Mista Vaita Navuru (Sentral), Mista Jack Bagita (Milne Bay), Mista James Koibo (Not Solomons).

TULTUL TITAN

MIPELA LONG ARC-TITAN I GAT PLANTI KAINKAIN WAIA LONG WOKIM BANIS. SAPOS YUPELA I LAIK SAVE MOA ORAIT.

RAITIM PAS TASOL I KAM-SAMPELA TAIM, DISPELA MAUSGRAS MAN SAM KAIMA I SAVE RAUN LONG HAILANS NA SAPOS YUPELA I GAT WARI LONG WAIA O NIL, EM I KEN STRETIM.

ARC-TITAN Pty. Ltd. P.O. Box 1026, LAE, Tel. 42 3988.

GAVMAN TAKISIM SIOS

Lokal Gavman Lo bilong 1971 i givim pawa long ol lokal gavman grup, olsem taun kaunsil na provinsal gavman, long putim takis long olkain graun na haus long taun. Na em i tok tu: "Tasol ol haus lotu na arapela ples bilong mekim wok lotu" i no mas gat takis bilong em.

Tasol i gat sampela taun kaunsil i save tok olsem: Haus lotu stret em i no ken takis, tasol ol arapela haus nabaut long en i ken. Olsem haus bilong pris o pasto i ken takis, na tu opis bilong em, na ples pilai bilong ol manki i kam long skul, na haus kibung bilong ol pipel bilong peris o sios, na tu ples bilong putim ol ka bilong ol manmeri i kamap long lotu.

Long Port Moresby, Siti Kaunsil i bin putim takis inap long K10,000 long wan wan yia i go long olgeta dispela kain haus samting i sanap nabaut long bikpela huas lotu bilong Asbisop ToPaivu. Katolik Sios i tok em i no inap baim dispela takis, olsem na kot long 1977 i bin daunim long K10,000 wantaim moa.

Ol loman i wok nau long stretim tok bilong dispela lo bai em i rit olsem: Yu no ken putim takis long haus lotu na ol arapela haus na ples klostu long em, sapos ol pipel i mas yusim bilong mekim wok bilong sios - olsem wok kibung na wok wantaim yut na opis bilong peris na ol samting olsem.

SMATPELA TOK BILONG SAVEMAN

"Sapos yu smat tru, yu no wok wok tasol long bungim planti mani. Mani bilong yu inap pinis wantu - olsem wanpela taragau i groim wing na i flai i go longwe."

- Buk Bilong ol Proverb 23, 7 -

Cut it out

To: Stonebridge Pty. Ltd.,
75 Melbourne Street, North Adelaide, S.A. 5006

Please send me my complete catalogue of Penguin books. I understand that books ordered from the free catalogue will be forwarded to me within one week. I enclose 50c stamp for postage and packing.

NAME

ADDRESS

POSTCODE

W1

**At last-
any Penguin book
you care to order.
Send for your
catalogue* NOW!**




*Over 100 pages listing complete series of Penguin classics, verse and plays, fiction and non fiction, humour, crime and mystery, cookery, crossword puzzles etc.

AVELING-BARFORD PACIFIC for your compaction requirements.

Vibratory Plates
Vibratory Rammers
Pedestrian Vibratory Rollers
(Double drum hydrostatic drive)

Agents for bearings and hose fittings Ryco-flex Nachi



AVELING-BARFORD PACIFIC PTY. LTD

Head office: Ume Street, Gordons, Port Moresby, Port Moresby.
PO Box 6457. Phone 257166 Telex NE22206

Lae depot: Morobe Avenue, PO Box 1191, Lae Phone 424188 Telex NE42411

YUNAITET PATI LAIK KAPSATIM GAVMAN

Mista Rafael Doa, memba bilong Westen Hailans na hetman bilong Yunaitet Pati, i laik traim kapsaitim gavman bilong Pangu Pati wantaim Pipels Progres Pati na kirapim wanpela nupela gavman insait long palamen i mas kibung long mun Ogas.

Mista Doa i tok olsem, pati bilong em i gat 19 memba long palamen na sapos ol i bung wantaim sampela arapela grup - olsem Pipels Yunaitet Fran bilong Iambakey Okuk na Pipels Progres Pati - bai ol inap long rausim Pangu na gavman bilong em na kirapim nupela gavman. Mista Okuk i wanbel tru long dispela aidia.

Long tingting bilong Mista Doa, gavman bilong nau i lusim namba bilong em pinis long ai bilong ol pipel. Ol i ting em i no gat strong. Planti pablik sevan i longlong nabaut na i kros long pasim bilong gavman; na ol i pilim em i no inap moa long ranim gut dispela kantri.

Mista Doa i tok moa: Gavman i bin mekim no-gut long ol ausait saveman na bisnisman i stap long pablik sevis na i ranim sampela bikpela wok long dispela kantri, na em i pret bai planti moa i laik ranawe i lusim dispela kantri nau na i no pinisim wok bilong ol.

Na tu ol pipel i krai long gavman i mas makim moa mani long mekim go het developmen long as ples. Tasol em i westim mani long planti arapela samting. Planti minista bilong gavman i save raun nabaut long ol ausait longwe kantri. Na planti mani tumaŕ i lus olsem, na ol pipel i no save long dispela samting.

Mista Doa i tok tu: Ol pipel nau i lap long palamen, long wanem em i no save bihainim laik bilong ol memba na harim gut tok bilong ol. Ol dispela memba i makim ol pipel.

Lida bilong Oposisen Mista Iambakey Okuk i save sindaun kibung tu wantaim ol Yunaitet Pati na Pipels Progres Pati. Em i laik tupela i bung wantaim na wokim wanpela nupela gavman. Tasol ol dispela bikpela lida bilong tripela pati ya i mas pasim tok pastaim long wan wan pati i ken kisim hamas minista insait long nupela gavman ol i laik wokim.

I luk olsem bai long mun Ogas kibung bilong palamen i ken narakain tru. Tasol Pangu Pati i gat planti save moa long wok politik na i no isi samting long rausim em.

WOK KOPRA

Mista Julius Chan, Minista bilong Pramerai Industri, i bin kisim ripot i tok, long dispela ya 1978 wok kopra i win moa. Stat long Januери i kam inap long pinis bilong mun Me long dispela ya PNG i bin wokim 57,884 tan kopra. Na long dispela ya tu prais bilong kopra i go antap.

Ol kopra senta i bin wokim moa kopra em long Buka na Kieta na Toboi na Alotau na Port Moresby. Tupela i bin go daun, em Wewak na Namatanai.

LUKIM DISPELA TOK SAVE


GAZELLE HOTEL PTY LTD RABAU

Olgeta manmeri i gat sea long Gazelle Hotel kampani bai gat kibung long Fraide, de namba 25 bilong mun Ogas long 10 klok moningtaim long gaden bilong Travelodge, Rabaul. Mipela i laik ol i kam long dispela miting. Na mipela i laikim tumas long lukim siaman Mista Nepetalai Tolirom i kam.

Cox Johnston & Company
Telipon: 92.2211

Coleman Lait em i San Bilong Nait

Coleman kerosin lamp em i nambawan tru long givim gutpela lait long yu. Sapos yu laik baim niupela kerosin lamp askim ol long Coleman tasol.



Coleman



GSB18



MAS BEKIM PAS

Dia Edita - Yu inap larim liklik spes bilong mi long putim liklik wari bilong mi. Wari bilong mi i go olsem. Planti manmeri long PNG i save raitim pas long penpren long Wantok nius.

Na bihain ol i kisim Wantok niuspepa na ol i lukim nem bilong penpren. Na tarangu em i amamas long bekim pas bilong man i laikim penpren. Tasol bihain dispela man i kisim pas bilong em na em i no bekim. Na em olsem wanem? I no laik bilong em i salim pas long yu.

Nogat. Yu yet laikim penpren na salim nem bilong yu long Wantok. Olsem na bipo yu mas ting gut na rait long Wantok Niuspepa. No ken pasim spes bilong edita i raitim sampela pas bilong ol brata na susa.

Em tasol. Sapos yu gat wari o belpen, orait, rait tasol i go long Wantok.

Francis M. Didiner,
Erave/S.H.P.

MARITMERI WOK

Dia Edita - Mi laik sapotim Tom Hio. Em tru, ol meri i wok long gavman na tu long kampani ol i save pasim spes bilong mipela ol yangpela man. Na taim ol meri i wok ol i save wok i gat inap wanpela yia o olsem wan na hap yia samting na ol i savel bel kwik kwik. Na taim ol i karim pikinini ol i save i stap wan mun o tu mun na ol i save kam bek long wok. Em i nogut tru. Mi laik ol meri i gat pikinini ol i mas pinis long kampani o dipatmen bilong ol na i kamap olsem haus waip na lukautim pikinini bilong ol.

Taim ol marit meri wok i no stret long mi, na yupela

ting olsem wanem husat bai lukautim pikinini bilong ol sapos man na meri tupela i go wok?

Dispela tok em i go long ol meri we i save wok long gavman na kampani na tu ol gels taim ol i go long skul em ol i save wetim mani bilong papa na mama. So i no gutpela tumas long salim ol yangpela meri i go long skul.

Monejo Nabuanto,
Kainantu/E.H.P.

VILES KLAP

Dia Edita - Mi gat dispela kain wari oltaim. Yes, mi gat belhevi tru na i no amamas tumas long toktok na tingting bilong Likalaisensing na Korektiv Minista Misis Nahau Rooney. Long toktok bilong en i tok long i mas i gat ples bilong dring e ples bilong salim wara bilong mekim ol man na meri i mas spak wantaim long ol viles wan

wan, em Viles Klap.

I tru, long tingting bilong Minista na ol arapela memba bilong Haus ov Asembli na ol politisen lida em i gutpela long helpim ol man bilong sevim mani bilong ol long viles bilong ol wan wan. Tasol long tingting na lukluk bilong mi long kastam bilong dispela kain rot na kaikai bilong en tru i helpim tumas long sindaun bilong gutpela pasin bilong ol man na meri long ol ples o viles.

Mi yet mi sori tru long gutpela pasin bilong ol na gutpela sindaun bilong ol famili laip bai bagarap na bruk daun olgeta long hul bilong bik man ya, em SETEN.

Em tasol pas bilong mi. Husat man o meri i laik bekim o skruim, mi sambai tasol long yu ken rait i go long Wantok Niuspepa na bai mi ken lukim.

Lanta P. Leo,
Madang.

KAMPANI LUKAUTIM WOKMAN BILONG BIPO

Cox Johnston & Co i wok long painim wanpela man, nem bilong em:

TAIPUN

na narapela nem bilong em: **MORGO ADAMS.**

Dispela man bipo i wokboi bilong Misis Una Florence Adams bilong Notre Mao Plantasin.

Dispela man yet o wanpela wantok bilong em i mas givim tok save long opis bilong Cox Johnson Kampani. Em hia oi adres bilong em:

P.O. Box 312, Port Moresby.

P.O. Box 918, Lae.

P.O. Box 987, Mt. Hagen

P.O. Box 711, Rabaul.



Strong Tru.

HUSKY DYNA

**Niupela trak bilong Toyota i save wok hat tru.
Yu laik karim kago o pasindia – long biktaun
o rot nogut long bus – dispela trak em inap.**

TOYOTA

BRANCHES AT: PORT MORESBY 25 4088 LAE 42 2322 MT. HAGEN 52 1888

ELA MOTORS LIMITED

MADANG 82 2188

RABAUL 92 1988

KIETA 95 6083

WEWAK 86 2255


GSP ET 013P

OL TESTAMEN STORI

Meri Moap I Go I Stap Long Betlehem

Rut 1:6 - 2:5

BIKPELA SIK I KAMAP LONG MOAP I PINIS, TASOL PLANTI MANMERI PIKININI I DAI, NA OL PIPEL I WOK LONG KRAI SORI YET.



EM HAUS BILONG NEOMI, DISPELA MERI ISREL LAKA? PASTAIM TUPELA PIKININI BILONG EN I DAI PINIS.

EM TASOL. NAU BAI EM I MEKIM WANEM? EM I NO GAT MAN NA I NO STAP LONG AS PLES BILONG EM. EM I NO INAP STAP GUT.

NEOMI I STAP INSAIT LONG HAUS NA I TINGTING...



OL MAN I KAM LONG NARAPELA PLES I TOK, BETLEHEM I GAT PLANTI KAIKAI. BAI MI GO BEK. TUPELA MERT HIA I KEN I STAP LONG AS PLES.

TUMORA LONG MONINGTAIM.



YUTUPELA I BIN LUKAUTIM MI, NA MI LAIKIM YUTUPELA. TASOL MOAP I NO AS PLES BILONG MI. NAU MI LAIK I GO BEK LONG BETLEHEM.

MITUPELA I SAVE, NA MITUPELA I LAIK I GO WANTAIM YU.

Used by permission of the David C. Cook Foundation. Copyright 1973, David C. Cook Publishing Co. All rights reserved.

OL TESTAMEN STORI

OL I KIRAP I GO NA I
KAMAP LONG MAK BILONG MOAP.

MI LAIK LUSIM
YUTUPELA NAU. YUTUPELA
YANGPELA YET, INAP
YUTUPELA I KEN MARIT GEN.
GOD I KEN WAS LONG
YUTUPELA, LONG WANEM,
YUTUPELA I BIN
HELPIM MI.



OPA I LUSIM NEOMI, TASOL RUT NOGAT.

YU NO KEN TOK BAI MI LUSIM
YU. YU LAIK I GO WE, BAI MI TU I GO.
OL LAIN BILONG YU BAI I STAP LAIN
BILONG MI, NA GOD BILONG YU BAI I
STAP GOD BILONG MI YET.



TOK BILONG RUT I MEKIM NEOMI I
KRAI. EM I TENKYU LONG GOD NA
I LARIM EM I GO WANTAIM EM.
OLSEM TUPELA I WOKABAUT I GO
KAMAP LONG BETLEHEM, AS PLES
BILONG NEOMI.

AMAMAS!
PLES TRU
BILONG MI I
STAP. NAU BAI
WANTOK I BELGUT
LONG MI, O
NOGAT?

DISPELA PLES BAI
I KAMAP AS PLES
BILONG MI. NAU
MI SAVE TINGTING
BILONG NEOMI
TAIM EM I STAP
LONG MOAP.



TUPELA I GO KAMAP NA OL MANMERI
I LUKIM TUPELA NA KIRAP NOGUT.

YU NEOMI O
NOGAT? YU NO
OLSEM BIPO.

EM MI TASOL. TAIM MI LUSIM
BETLEHEM MI GAT MAN NA TUPELA
PIKININI. TASOL NAU NOGAT. MI
GAT TAMBU PIKININI MERI
TASOL.



OL TESTAMEN STORI



NEOMI, YU NO KEN KRAI. SAMPELA PREN BILONG YU I STAP LONG BETLEHEM. BAI OL I HELPIM YU.

MASKI, BAI MI YET I KISIM WIT BIHAIN LONG OL WOKMAN.

SORI RUT, DISPELA I HATWOK TRU. TASOL MITUPELA I NO GAT KAIKAI.



OLSEM NA LONG DE. BIHAIN RUT I GO LONG GADEN WIT AUSAIT LONG TAUN BILONG KISIM WIT I PUNDAUN NATING.

YU HUSAT? BIKPELA MAN BILONG MIPELA I ORAIT LONG YU WOK HIA?

EM I LUK OLSEM MERI BILONG NARAPELA KANTRI.



MI BIN ASKIM BOSMAN NA EM I ORAIT LONG MI KISIM WIT. MIPELA I NO GAT KAIKAI.



EM I TOKTOK YET NA PAPA BILONG OL GADEN I KAM.

DISPELA YANGPELA MERI EM HUSAT?